

PDF AUR EPUB



ABDE MUSTAFA





PDF *AUR* 
EPUB

ABDE MUSTAFA



Abde Mustafa Publications

Copyright © 2023 by
Abde Mustafa Publications

All rights reserved.
No part of this publication
may be reproduced,
distributed, or transmitted
in any form or by any
means, including
photocopying, recording,
or other electronic or
mechanical methods,
without the prior written
permission of the publisher,
except in the case of brief
quotations embodied in
critical reviews and certain
other noncommercial uses
permitted by copyright law.

PDF aur EPUB?

Writer: Abde Mustafa Muhammad Sabir Qadri

Roman Urdu Transliteration
By Team Abde Mustafa Official

Publisher: Sabiya Virtual Publication
Running Under Abde Mustafa Publications
Powered by Abde Mustafa Official

in association with: Technical Sunni
Powered by Abde Mustafa Official


Publication Date: July 2023 Total Pages: 21
Genre: Aqaide Ahle Sunnat
Laanguage: Roman Urdu
Book No.: SVPBN411

Cover Design & Formatting : Pure Sunni Graphics



in association with:





All Praise to Allah, the Lord Of The Creation,
and countless blessings and peace upon
our Master Muhammad, the leader of the Prophets.

Contents

About Us	2
PDF Ya EPUB?	4
Kya dusre formats Portable nahin hain?	4
EPUB kya hai?	5
PDF aur EPUB mein pehla farq: Fix layout.....	6
Dusra farq: copy paste limit	7
Teesra farq: Search.....	8
Chautha Farq: Editing.....	9
Panchwa Farq: Colors.....	10
EPUB ke liye kaunsa app use karein?	10
Chhata Farq: File size	11
Saatwa Farq: Conversion	13
Aathwa Farq: Digital Publishing.....	13
Nawaa'n Farq: E Book Readers.....	14
EPUB yaani App	15
Aakhiri baatein	16

About AMO

AMO yaani Abde Mustafa Official ek team hai jiska aaghaz sana 1435 hijri (2014 eiswi) mein hua, Is ka talluq Ahle Sunnat Wa Jama'at se hai, Ye team aalami satah par electronic media aur print media ke zariye Islami taleemaat ke farogh ke liye kaam kar rahi hai

Humare departments aur activities:

• Blogging

Hum mukhtalif zubano aur mauzuaat (topics) par tehreerein aam karte hain jo ke ilmi, tehqeeqi aur islahi hoti hain, ye tehreerein humare blog par dekhi ja sakti hain
visit: amo.news/blog

• Abde Mustafa Publications

Ye humara markazi shoba (department) hai jahan mukhtalif zubano aur mauzuaat par kitabein publish ki jaati hain, Humari shaya ki gai kitabo ko padhne ke liye humari website par jaayein
visit: amo.news/books

• Sabiya Virtual Publication

Ye platform virtual publishing ke liye hai yaani kitabo ko digital formats mein internet par publish kiya jaata hai, iske zariye digital library mein musalsal kitabein shamil ki ja rahi hain

- **Roman Books**

Ye department kitabo ko Roman Urdu script mein dhaalne ke liye hai, Roman Urdu ke badhte hue istemal ko madde nazar rakhte hue ye kaam shuru kiya gaya hai
visit: romanbooks.in

- **E Nikah Service**

Ye ek matrimonial service hai jo khaas ahle sunnat ke liye shuru ki gai hai, Is service ke zariye Sunni rishte talash kiye ja sakte hain
visit: www.enikah.in

- **Nikah Again Service**

Ek se zaaid nikah (Polygamy) ki tarweej ke liye Nikah Again Service shuru ki gai hai

- **Technical Sunni**

Technology se judi malumaat ko aam karne ke liye humne is muhim ka aaghaz kiya hai, Is mein hum Technology se judi malumaat ko munfarid andaz mein pesh karte hain taaki qaum usse faida utha sake

Mazeed malumaat haasil karne ya kisi tarah ki koi shikayat darj karne ke liye humse rabta karein

Abde Mustafa Official

PDF Ya EPUB?

PDF ek bahut mash'hoor file format hai, meri is tehreer ko padhne waala shayad hi koi shakhs aisa hoga jisne ye naam na suna ho, PDF files ka istemal kasrat se hota hai, Aaj se 12-15 saal pehle ki baat alag thi lekin ab har shakhs ke paas smartphone hai jin mein PDF files support karti hain to taqreeban log ab isse waqifiyat rakhte hain

PDF ke istemal ka daaira bahut bada hai, Ye hargiz na sochein ke faqat deeni kitabo ke liye iska istemal hota hai ya sirf kitabo tak hi iska दौरa mahdood hai

Ye aisa format hai ke jiska istemal har tarah ke document ke liye kiya jaata hai ab chahe wo certificate ho, receipt ho, printing ke liye kisi tarah ki file share karni ho, kisi tarah ka notice ho ya phir kisi aur qism ka dastawez ho, har jagah iska istemal bilkul aam hai

PDF ka full form Portable Document Format hai yaani aisa format jiske zariye documents ko portable yaani idhar udhar aane jaane waala bana diya jaaye

Kya dusre formats Portable nahin hain?

Aisa nahin hai ke sirf PDF format hi portable hai, dusre formats bhi portable hain lekin PDF kaam ko aasan banata hai, dusre formats ke jinse convert kar ke hum PDF banate hain, un formats ko aage bhejna PDF ki tarah aasan nahin

hai aur dusri mushkil ye hai ke agar hum unhein aage bhej dete hain to phir use access karne ke liye same software hona bhi zaroori hai to zaroori tha ke koi common file format ho jo sabke paas ba aasani available ho to iske liye PDF behtareen format hai

EPUB kya hai?

EPUB yaani electronic publication, iske zariye kitabo ko virtually publish kiya jaata hai, ye format sabse zyada kitabo ke liye istemal kiya jaata hai, Jise hum Ebook kehte hain uske liye EPUB best format hai, Ise hum aasan lafzo mein kahein to digital kitabein padhne ke liye PDF se behtar EPUB format hai aur yahi humari is tehreer ka unwaan hai ke "PDF ya EPUB?"

Ab hum iski tafseel bayaan karenge ke EPUB kyun behtar hai aur is mein humein wo kaunse features dekhne ko milte hain jo PDF mein nahin milte, Ummeed hai ke isse log faida zaroor uthayenge, Jo duniyawi kitabein padhte hain yaani asri uloom se jinka talluq hai wo bhi EPUB ke istemal se faida uthayenge aur apne exams, reading experience aur financial life mein aasani paida kar payenge aur isi tarah deeni kitabo mein bhi iska riwaaj padega jo ke na ke barabar hai

PDF aur EPUB mein pehla farq: Fix layout

PDF mein layout waghaira fix hota hai yaani agar ek kitab ke page ka size 6x9 inches hain to wo isi ke saath har jagah open hoga, Agar fonts ka size 16pt hai to phir har jagah ye isi size mein khulega, haan ye zaroor hai ke badi screens pe bada dikhega aur chhoti screens par landscape mode mein ya phir zoom kar kar ke padhna hoga

EPUB mein aisa nahin hai, is mein reflowable text hota hai yaani aap page ke size ke saath saath text font bhi tabdeel kar sakte hain! Agar aap koi kitab PDF mein padh rahe hain ke jiske fonts bahut chhote hain aur aapki screen kisi mode par readable nahin hain aur aapko baar baar zoom in zoom out karna pad raha hai to zaahir si baat hai ke padhne mein disturb hoga aur waqt bhi zyada lagega lekin aise mein EPUB ko adjust kiya ja sakta hai, aapki screen ke mutabiq aur aapke focus ke mutabiq

sirf page size yaani screen ke corners se margins aur fonts ke size hi nahin balki do lines ke beech ka difference (line spacing) bhi ghataya ya badhaya ja sakta hai! hai na kamaal? agar aap koi kitab padh rahe hain jis mein do lines ke darmiyan ka space kam hai to EPUB format mein aap usko customize kar sakte hain

Dusra farq: copy paste limit

PDF files mein bhi text copy ho jaata hai lekin is mein bahut masail hote hain, maslan urdu files yaani urdu kitabo mein jab aap urdu text ko copy karenge to use kahin aur paste karne par uski haalat bigad jaati hai, wo apni asli haalat mein paste na ho kar kuchh aur ban jaata hai, niche hum ek urdu pdf file se text copy kar ke paste kar rahe hain

”i.ÂCE?E}xÉ.÷5!P!Û\$CE,,!B."m!@!.B!ÈD.B@X!,œ.J!Ï!ö
 ÂxÌ0è@!LE?}Ò\$CE,,!B!/E÷j!/\$U|,,Y!CE?@'Š.+
 :ñÿ@!•œ÷+_j!+CEACE?ÛA''!0â.B!"2f@!•Aâz°3^\$[.B!L¼R
 @ô9(...A_!!|B(...œU¼BF!"L.B!A3?B!.ËxÉ
 /ó3;Æ™ÿ@!L>Ú"\$!%o-
 /dB\$!!ÚCE?@'Š.+•@!.B!È||K!.B!4Gô9"QFBzÁ-Û(...xÉô»,
 •@!.B!E}+œ"6' iá.@%ozÁ-E}xÉ.÷œ
 iáKÓ(...!%Ä"!(...±6*!|Èg¾4!«"A"E.j.B!L"\$ó!g;!!FBM•2!.
 B!ÈÀô.Wÿ@!{|Ô•?!|;ÐÛÀÇ.Óé,È0ùlÛÀÇ\$X<A“

EPUB file mein aisa nahin hota, Agar aap EPUB file mein urdu text ko copy karte hain to wo proper paste hota hai, Ek EPUB file se aap urdu text ke kisi bhi hisse ko copy kar ke kahin bhi paste kar sakte hain, Ab hum EPUB file se urdu text copy kar ke yahan paste kar rahe hain:

دنیا میں پائے جانے والے جتنے بھی مذاہب و ادیان ہیں، وہ چاہے سماویہ ہوں یا غیر سماویہ؛ ان سب نے اپنے ماننے والوں پر ماہانہ، سالانہ یا پھر روزمرہ کے معمولات میں کچھ عبادات لازم کی ہیں۔ ان عبادات پر مطلع کرنے کے لیے ہر مذہب نے اپنا ایک طریقہ رکھا ہے۔ جیسے ہندوؤں کا اپنی بوجھاپاٹ کے لیے گھنٹی بجانے کا

انتخاب کرنا وغیرہ۔ اسی طرح اسلام کی اہم ترین عبادت نماز کی طرف بلانے کے لیے حاجت پیش آئی۔ شروع اسلام میں اعلانیہ عبادت کا معمول نہیں تھا لیکن جیسے ہی اسلام پھلتا پھولتا مدینے کی فضاؤں تک پہنچا؛ تو اب اس اہم فریضہ یعنی نماز پر مطلع کرنے کے لیے بحث چھڑی کہ نماز کی طرف کیسے بلایا جائے۔ پھر صحابہ کرام نے مختلف آرا پیش کیں۔

Ye to urdu ki misaal thi, Iske ilawa aap English ya Hindi waghaira kisi bhi language mein text ko copy karenge to aapko aise masail ka saamna karna padega, Maan lete hain ke english mein text ki haalat nahin bigdegi lekin jab aap do teen pages ko copy karenge to wo page numbers ke saath header footer mein maujood tilte waghaira ko bhi copy kar lega jisko edit karna ek alag mas'ala baaqi rahega

Ab aap khud sochein ke EPUB file ka ye feature kitna faidemand hai

Teesra farq: Search

do bade bade farq ko batane ke baad ab hum teesre aise farq ke baare mein batane ja rahe hain ke jo bahut zyada aham hai, ji haan! wo hai search ka feature

PDF file mein bhi search ka option hota hai lekin wo itna achha nahin ke jis tarah EPUB mein hai, PDF file mein aap jab search karenge to kai tarah ke issues dekhne ko milenge, Urdu file mein to bahut zyada hi milenge aur achhi tarah search bhi nahin hoga phir jo results aayenge un mein switch

aur jump karna bhi EPUB ki tarah nahin hoga

EPUB file mein aap search karne ke baad dekhenge ke results bahut jald saamne aa jaate hain aur un tak pahunch kar unhein badi aasani se copy kiya ja sakta hai

Misaal ke taur par Abde Mustafa Publications ki taraf se Seerate Mustafa ki roman urdu EPUB file publish ki gai hai, jab hum is file mein Seerate Mustafa ke kisi pahlu ya kisi waqiye ko search karna chahein to badi aasani se kar sakte hain, Agar humein junge khaibar ki tafseel padhni hai ya usse mutalliq koi baat talash karni hai to search mein sirf "Khaibar" likh kar hum results ke zariye na sirf tafseel ko fauran dekh sakte hain balki copy kar ke share bhi kar sakte hain

Chautha Farq: Editing

PDF file mein editing mushkil hai kyunki wo aslan kisi aur format mein thi jisse use PDF mein convert kiya gaya hai, EPUB file mein editing aasan hai kyunki asal text par aapko access milta hai, bina baahar nikaale hi us mein kaafi customization ho jaati hain aur agar baahar nikaal lein to jaise chahein edit kar sakte hain

Kai log humse ye kehte hain ke Abde Mustafa Publications ki roman urdu kitabo mein sentence case rakha jaaye (yaani ek sentence mein bas pehla word capital ho baaqi

sab small, jaisa ke is risale mein bhi hai) aur kai logon ko aur humein bhi har word ka pehla letter capital achha maloom hota hai aur isi tarah kai log chahte hain ke totally small ho to wo text ko kisi bhi case changer website ya app se fauran change kar sakte hain aur use WhatsApp, Telegram ya kahin bhi paste kar ke padh sakte hain

New formatting bhi is tarah text nikaal kar aasani se ki ja sakti hai, Agar deeni kitabo ko EPUB mein dhaal diya jaaye to ye aisa hai ke use humesha ke liye digital kar dena, Aainda jo jab chahega aasani se access kar lega aur editing kar ke kisi bhi tarah publish kar sakega

Panchwa Farq: Colors

PDF file mein hota ye hai ke jin colors mein formatting ki gai hai, hum unhi colors mein document ko dekh sakte hain aur zyada se zyada dark night mode ya grayscale mode waghaira istemal kar sakte hain lekin EPUB file mein aap manpasand colors ke saath document ko customize kar sakte hain aur highlights waghaira ke bhi aapko kai options dekhne ko mil jaate hain

EPUB ke liye kaunsa app use karein?

PDF ke liye to Adobe Acrobat Reader bahut mash'hoor hai lekin hum XODO humari taraf se recommended hai

PDF ke liye bahut saari applications hain maslan Google

ka PDF viewer aur by default bhi mobile phones mein maujood hoti hain agarche wo kuchh khaas nahin hoti lekin kaam chalane ke liye kaafi hoti hain

EPUB ke liye agar aap smartphone use karte hain to "Lithium" ko istemal karein aur agar PC par EPUB files ko open karna hai to "Calibre" ko use karna behtar rahega

Iske ilawa aur bhi bahut saari applications maujood hain aur jinke paas waqt aur resources hain to unhein chahiye ke mazeed applications ko try kar ke dekhein aur sab ke saath khelein taaki aapko wo new ideas aur cheezein mil sakein jo humein bhi nahin mili

Waise talented log kabhi bhi aisa nahin karte ke jitna unhein bataya gaya hai usi par aankh band kar lein aur aisa band kar lein ke kuchh dekhne ki koshish hi na karein, Talent ek aisa parinda hai jo qaid se faraar hone ke liye humesha koshish karta rehta hai aur kisi ek maqaam par thehar kar khush fahmi mein nahin padta balki wahan tak ud kar jaata hai jahan tak uski asal udaan hai

Chhata Farq: File size

PDF files ka size kaafi zyada hota hai, Kabhi kabhi kaafi kam hota hai lekin us waqt ke jab standard formatting ki jaaye, Abde Mustafa Publications ki kitabein bahut kam size mein available hain jiski wajah ye hai ke humne standard

style choose kiya hai aur agar ye kiya jaaye ke ek kitab mein phool patto se bhare page borders aur phir har heading (unwaan) aur zeli unwaan (sub heading) par bhi aise boxes saza diye jaayein to file ka size itna zyada ho jaata hai ke aisi aisi 10-12 kitabo mein 1GB memory full ho sakti hai

EPUB file ka size bahut kam hota hai, Achha khaasa mawaad 1MB se kam mein aa jaata hai aur agar bahut zyada mawaad hua to 5MB ke andar kaam ho jaata hai, Haan EPUB file mein ek option hota hai fonts ko shamil karne ka jise fonts embedding kehte hain, iska seedha matlab ye hai ke jo fonts aapne istemal kiye hain unhein bhi aap file ke saath attach karna chahte hain taaki jo bhi use open kare to unhi fonts ke saath dekh sake, ab yahan file ka size depend karta hai ke aapne kitne aur kaun kaun se fonts use kiye hain aur unke sizes kya hain, agar aapne 10MB waale 4-5 fonts use kiye hain to phir file ka size kaafi badhne waala hai

Abde Mustafa Official ki website par aapne ghaliban dekha hoga ke EPUB files do tarah ki available hain, ek LQ aur ek HQ, LQ yaani low quality aur HQ yaani high quality, Low quality mein fonts embedded nahin hote jabki HQ mein fonts embedded hote hain, LQ files system ke hisab se open hoti hai aur HQ mein aap un fonts ke saath file ko dekh sakte hain jo creator ne use kiye hote hain

Ab ye ek lambi bahas hai ke EPUB files banai kaise jaati hain aur fonts embedding ka kya process hai, Ye hum phir kabhi bayaan karenge

Saatwa Farq: Conversion

Ye editing ke farq se milta julta hai magar usse alag hai, Poori file ko convert karna kaafi aasani faraham karta hai aur PDF file ko kisi aur format mein convert karna kaafi challenging saabit ho sakta hai jabki EPUB file ko dusre kai formats mein aasani se convert kiya ja sakta hai maslan HTML, TXT aur DOC

Agar kitabo ko ek baar EPUB file bana diya jaaye to present aur future se related kai faido ko ek saath haasil kiya ja sakta hai, Aaj wo kitabein padhi jayengi aur kal kabhi bhi use publish karna aasan hoga

Aathwa Farq: Digital Publishing

kitabo ke jo bade bade platforms hain jahan par poori dunya se readers visit karte hain, un ke paas faqat angrezi kitabo ki bharmar hai, deeni kitabo ki tadaad agarche hai lekin Ahle Sunnat Wa Jama'at ki kitabein bilkul na ke barabar hain, Ek badi wajah yahan EPUB bhi hai kyunki ye websites ya platforms PDF file nahin lete, Agar aapke paas faqat PDF file hai to in bade platforms par aap kitabein submit nahin kar sakte, Yahan EPUB format kaafi kaam aata hai, ye taqreeban har website par acceptable hota hai

Agar humein Digital Publishing mein aage badhna hai to EPUB format par kaam karna hi hoga, Iske zariye hum apne

content ko aalami satah par ek bahut bade paimane par aam kar sakte hain

Nawaa'n Farq: E Book Readers

ye bhi ek bada difference hai kyunki kai E Book Readers aise hain jin mein PDF supported nahin hain aur ek tadaad aisi hai jo in readers par angrezi kitabein EPUB format mein padhti hain lekin PDF files ko us mein open nahin kar paati, Ab agar hum EPUB format provide na karein to do sooratein ho sakti hain, Ek to ye ke aisi audience deeni kitabo se mukammal door rahegi ya phir ghairo ki kitabein mutale mein layengi, Hum in dono ko rokna chahte hain aur iske liye humein EPUB files par kaam karna hi hoga

EPUB yaani App

Agar kisi kitab ko EPUB format mein dhaal diya jaaye to iska ek matlab ye hota hai ke us kitab ka app ban gaya! aaiye dekhte hain wo kaise:

Aapne app store par aisi apps dekhi hongy ke jo kitabo ke upar based hai maslan mashhoor kitabein jaise Fatawa Razawiyya aur Bahaare Shariat waghaira ki app maujood hain, In apps mein sabse bade do features maane jaate hain, Pehla hai copy paste aur dusra hai search ka option aur EPUB file mein ye dono baatein maujood hoti hain

Ek aur bada point ye hai ke app store se aakhir kitni kitabo ke apps download kiye ja sakte hain? Agar aapne 20-25 kitabo ke apps install kar liye to aapki memory ka kya haal hoga? Agar aapke paas bahut zyada mehenga smartphone hai to bhi aap kitne apps install karenge? Aur phir kitni kitabo ke apps bhi available hain?

EPUB files mein bas aapko ek app install karna hai aur wo hai Lithium app, ye humari taraf se recommended hai baaqi aur dusre bhi try kiye ja sakte hain, Ab aapke paas bas ek app hai aur aap is mein jitni chahein EPUB files open kar sakte hain yaani bina mobile phone ke app storage ko block kiye aap saikdo apps rakh sakte hain! hai na kamaal?

Misaal se yun samjhein ke aapne Lithium app download kiya aur uske baad Abde Mustafa Official ki website se 100 EPUB files download kar li, Ab aap sab ko ek jagah istemal

kar sakte hain aur wo bhi ek interface ke saath, Aapko alag alag apps nahin rakhni honggi aur na to sab ko alag alag open karne ka mas'ala rahega, Bas ek reader open kijiye aur uske andar saikdo kitabo ki apps paaiye aur phir search aur copy paste karte jaaiye!






App banane mein bahut zyada kharch bhi hota hai aur isi wajah se tawanai ek hi kitab mein zyada lag jaati hai jabki EPUB file bana kar kai kitabo par bachi hui tawanai aur maal sarf kiya ja sakta hai

Aakhiri baatein

Is talluq se aur bhi tafseel bayaan ki ja sakti hai lekin yahan itna kaafi hai, Samajhdar logon ke liye ye ishare hi bahut hain aur na samajhne waalo ke liye bahut zyada tafseel bhi nakaafi

Allah Ta'ala se dua hai ke wo humari qaum ke naujawano ke andar jazba paida farmaye ke wo aage aa kar deen ka kaam karein aur qaum ke faide ke liye apne shabo roz guzarein

Our Other Publications



Abde Mustafa Publications

abdemustafa.com



/abdemustafaofficial

AMO

Powered By Abde Mustafa Official



ISBN (N/A)